

Visoki predstavnik razgovarao sa zamjenikom pomoćnika državnog sekretara SAD-a o izazovima u BiH



Stalno osporavanje Daytonu i njegovih ključnih institucija, retorika podjele i osporavanje suvereniteta i ustavnog poretka BiH nažalost i dalje narušavaju političku scenu u BiH, izjavio je danas visoki predstavnik Valentin Inzko. On se susreo sa zamjenikom pomoćnika državnog sekretara SAD-a za evropske i evro-azijske poslove, Phillipom Reekerom, tokom njegove posjete Sarajevu.

Visoki predstavnik i zamjenik pomoćnika državnog sekretara Reeker razgovarali su o aktuelnom stanju političke paralize u BiH, uključujući neusvajanje državnog budžeta i neuspjeh u formiranju novog Vijeća ministara. Razgovarali su također o složenom i glomaznom administrativnom sistemu u Federaciji BiH, te stalnim dilemama koje postoje vezano za spremnost stranaka da prihvate i ispoštuju Konačnu odluku i status Brčko Distrikta.

Visoki predstavnik istaknuo je kontinuiranu potrebu da se pruži podrška institucijama BiH, te je izrazio zabrinutost činjenicom da nije usvojen budžet na državnom nivou za 2011. godinu. "Posljedice potpunog zastoja u usvajanju budžeta, koji još uvijek traje, bile bi veoma ozbiljne za ključne daytonske

institucije i državu u cijelosti," istaknuo je visoki predstavnik.

Pozdravljajući novo pojačano prisustvo EU u BiH, visoki predstavnik je podvukao "odlične radne odnose" između OHR-a i EU u BiH.

Govoreći o mogućem putu naprijed, visoki predstavnik je napomenuo da međunarodna zajednica može i hoće pomoći zemlji na njenom putu oporavka, naglasivši da će to biti moguće samo ako lideri BiH budu zajedno radili kako bi osmislili i implementirali konstruktivan program u interesu građana BiH, koji je potpuno u skladu sa Mirovnim sporazumom i odlučno vodi ovu zemlju ka evroatlantskim integracijama.